

Marrion Joy Angara (10 onns) da Casiguran

Marrion Joy Angara ei la pli giuvna da tschun affons. Ella vegn denton tractada da ses geniturs exactamein tuttina sco ses fargliuns. Era ella sto segidar vid il tenercasa, quei che secapescha buca da sesez en las Filipinas. Ils pli giuvens affons vegnan numnadamein savens preferi in tec da lur geniturs.

Malgrad ch'ella fagess bugen trasora termagls, sa ella buca adina far quei.

Cu ella sededesta metta ella ensemen siu resti da letg e tschenta quel el cantun da deposit. Ils affons dierman per ordinari sil plantschiu dalla hetta – leu, nua che la famiglia secatta duront il di. Ils dus fargliuns vegls lavuran ordeifer e stattan buca pli a casa.

„Nus repartin las lavurs dil tenercasa sco lavar giu, prender si il plaunschiu, scuar il plaz avon hetta, ir per aua e cuschinar ris“, di Marrion. Buobs e mattatschas han cheu ils medems pensums. Mumma Tessie declara: „Nus lein semplamein ch'ils affons capeschien ch'ei detti ella veta temps da lavur e temps per far termagls.“

Sche Marrion emblida in pensum a casa survegn ella da sia mumma ina schlepra. Quella regorda ella, ch'ella ha emblidau enzatgei. Quei ei denton la mendra conseguenza che sa schabegiar ad ella.

Castitgs corporals violents – sco per exempel bastunar il tgil cun ina tschenta – ein ozildi scumandai tenor lescha.

Cu Marrion ha ventschiu las lavurs dil tenercasa ed ils pensums va ella giuadora per far termagls culs affons dalla vischinonza silla via da sulada datier da lur hetta. Ils affons han lur giugs ch'els fan bugen, cheutier drovan els lur flip-flops e cuoran ina massa. Buobs e mattatschas giogan ensemen, savens en equipas mischedadas.

Marrion va era fetg bugen cun velo, malgrad che quel s'auda all'entira famiglia, ei memia gronds ed il sèz ei montaus memia ault.

„Mintgaton vul ella adina mo far termagls, ella viva sur jamnas mo giuadora“, di il bab Marlon surriend.

Forsa ei quei il motiv ch'ella ha la pli stgira pial da tut ses fargliuns. Siu frar vegl Marlon Jay cudezza trasora ella pervia da quei e numna ella ina Agta. Ils Agtas ein in pievel indigen da pial stgira che viva ella regiun. Quellas gomias van magari silla gnarva ad ella.

Tuttina vivi ella bugen cun sia famiglia. Ella ha bia temps liber per far ni schar star quei ch'ella vul. Ella astga era dir quei ch'ella vul, cunzun sch'igl ei enzatgei prudent e sch'ella di ei cul respect dueivel.

„A casa eis ella ina vera paterliera“, fa il bab ina sgnocca.

Marrion conceda ch'ella damogna il bia buca dad ir en baselgia la dumengia. La messa ella caplutta dil vitg entscheiva gia allas sis dalla damaun. Lu dierma ella aunc. Pli baul era ei dallas siat. Mo las sis ei memia baul e la baselgia principala, nua la messa entscheiva pèr pli tard, ei dudisch kilometers naven. „Mo jeu urel mintga sera avon che durmir“, di ella.